

- सी बी आई एप रे मार्फत धोखाधडी करण वाळी निवेश री योजनावां ऊं जुड्या मामला री जांच सारू देशभर मांय तलाशी अभियान चलायो।
- अजमेर लोकसभा हलका रा नान्दसी गांव रा एक मतदान केन्द्र माथे काल संवारे सात बज्यां ऊं ओजू वोट पडेला।
- देश मांय अप्रैल महीना मांय रिकॉर्ड 2 लाख 10 हजार करोड़ रुप्या जीएसटी री मद मांय भेळा करी ज्या।
- मजदूर दिवस रे मौके प्रदेशभर मांय मजूरां रा भला ऊं जुड्या न्यारा-न्यारा कार्यक्रम राख्यी ज्या।

000

केन्द्रीय जांच ब्यूरो सी बी आई एप रे मार्फत धोखाधडी करण वाळी निवेश री योजनावां ऊं जुड्या एक मामला री जांच सारू दस राज्यां अर केन्द्र रा राज वाळा प्रदेशां मांय तीस ठोडां तलाशी रो अभियान चलायो। ई दौरान मोबाइल फोन, कम्प्यूटर हार्ड ड्राइव, एटीएम कार्ड, सिम कार्ड अर दूजा आपत्ति लायक कागजात समेत खास डिजिटल सबूत जब्त करी ज्या। सीबीआई दो गैर-सरकारी कंपनियां अर वां रा निदेशकां रे खिलाफ धोखाधडी रो मामलो दर्ज कीनो है। आं माथे एचपीजेड टोकन एप ऊं जुडी दगाबाजी वाळी निवेश योजना मांय शामिल व्हेवण रो आरोप है। **राज्य मांय ई जोधपुर समेत 6 ठोडां तलाशी लीरीजी।** हाल ताई री जांच मांय आरोपितां कानी ऊं निवेशकां ऊं रकम भेळी करण सारू करीब डोढ़ सौ बैंक खाता काम लेवण री ठा पडी है। मामला री जांच करी जा रही है।

0000

सुपर सोनिक मिसाइल टॉपीडो-SMART प्रणाली रो आज संवारे ओडिशा मांय कामयाबी सागे परीक्षण करी ज्यो। रक्षा मंत्रालय रे मुजब इण ऊं भारतीय नौसेना रा पनडुब्बी रे खिलाफ लडाई रा बूता मांय बधोतरी व्हेला। रक्षा मंत्री राजनाथ सिंह SMART टॉपीडो रा कामयाब परीक्षण परां रक्षा अनुसंधान अर विकास संगठन ने बधाई दीनी है।

0000

अजमेर लोकसभा हलका रा नान्दसी गांव मांय एक मतदान केन्द्र माथे काल ओजू वोट पडेला। निर्वाचन आयोग 26 अप्रैल ने पड्या वोटों रे दौरान ई बूथ माथे 17 ए रजिस्टर गम जावण रे कारण ओजू वोट पड रह्या है। मुख्य निर्वाचन अधिकारी प्रवीण गुप्ता बतायो के मसूदा विधानसभा हलका रा मतदान केन्द्र संख्या 195, राजकीय उच्च माध्यमिक विद्यालय नान्दसी रा कमरा नं. 1 रा ई बूथ माथे काल संवारे 7 बज्यां ऊं सिंज्या पांच बज्यां ताई ओजू वोट पडेला। गुप्ता बतायो के निर्वाचन विभाग ई सारू सगळी तैयारियां कर लीनी है। मुख्य निर्वाचन अधिकारी बतायो के ई मामला मांय अजमेर री जिला निर्वाचन अधिकारी पोलिंग पार्टी रे खिलाफ कार्यवाही कीनी है। ध्यानजोग है के ई बूथ माथे 26 अप्रैल ने वोट पडबा रा पूरा काम री वेबकास्टिंग करी ज्यी ही।

00000

गुजरात अर महाराष्ट्र रा स्थापना दिवस रे मौके आज जयपुर रा राजभवन मांय ई खास कार्यक्रम राख्यी ज्यो। ई मौके राज्यपाल कलराज मिश्र दोन्यूं राज्यां रा लोगां सागे बातचीत कर र वां ने शुभकामनावां दीनी। राज्यपाल कहयो के महाराष्ट्र अर गुजरात न्यारा-न्यारा राज्य बण्या पाछे देश री बरकत मांय खास

काम कीनी है। वे गुजरात अर महाराष्ट्र ने आजादी री लडाई री उर्वरा भूमि बताता थकां महात्मा गांधी, सरदार पटेल अर लोकमान्य तिलक ने ई याद कीनी। राज्यपाल कह्यो के एक भारत श्रेष्ठ भारत रा तैत राज्यां रा स्थापना दिवस मनावणों विविधता मांय एकता री अनूठी संस्कृति ने आगे बधावे है। वे दोन्यूं राज्यां री खुशहाली री कामना कीनी।

00000

अप्रैल महीना मांय सकल वस्तु अर सेवा कर—जीएसटी रे पेटे हाल ताई सब ऊं बत्ती 2 लाख 10 हजार करोड़ रूप्या री रकम भेळी करी ज्यी है। वित्त मंत्रालय रे मुजब जीएसटी री रकम भेळी करण मांय सालाना 12 दशमलव 4 फीसदी री बधोतरी व्ही है। जीएसटी री कुल रकम मांय 43 हजार करोड़ रूप्या ऊं बत्ती रकम सीजीएसटी मद मांय, 53 हजार करोड़ रूप्या एसजीएसटी मद मांय अर 99 हजार करोड़ रूप्या आईजीएसटी मद मांय मिल्या। ई रे अलावा 13 हजार करोड़ रूप्या सेस रा तौर ऊं मिल्या।

00000

अंतर्राष्ट्रीय मजदूर दिवस रे मौके आज प्रदेश मांय न्यारा—न्यारा कार्यक्रम राख्यी ज्यो। जयपुर मांय एक गैर—सरकारी संस्था री ओर ऊं बस ऑटो—रिक्शा अर रिक्शा चलावण वाळां रो मान करी ज्यो। भीलवाड़ा रा औद्योगिक हलका मांय राख्यी ज्यो कार्यक्रम मांय मजूरां ने दिल री बीमारी ऊं बचाव रा पांच हजार कित मुफ्त बांटी ज्यो। कोटपुतली—बहरोड़ जिला रा नीमराना, बहरोड़, कोटपुतली अर विराटनगर मांय मजूरां रो मान करी ज्यो। पावटा मांय **आर्टिफिशियल इंटेलिजेंस के दौर में श्रम शक्ति पर संकट** मुद्दा माथे चर्चा करता थकां भणार्ई—लिखाई रे मार्फत नौकरी—घंधा रा नुवा मौका रा बारा मांय विचार करी ज्यो। झालावाड़ मांय रोड़वेज मुख्यालय माथे संगोष्ठी राख्यी ज्यी।

भवानीमंडी री राजस्थान टेक्सटाइल मिल मांय मजदूर यूनियन री ओर ऊं मजूरां रो मान करी ज्यो। झालरापाटन मांय ई मजूरो रो मान करी ज्यो। बूंदी मांय स्काउट गाइड अर स्कूलां रा विद्यार्थी जागरूकता रैली निकाल र नारां रे मार्फत मजूरां मांय जाग जगायी। सवाईमाधोपुर जिला रा रूकमणी वृद्धाश्रम मांय असंगठित हलका रा मजूरां सारु विधिक सेवा योजनावं रा बारा मांय विधिक जागरूकता शिविर लगायी ज्यो। सलूबर जिला रा जावर माइन्स हलका मांय वाहन रैली निकाली ज्यी अर सभा राख्यी ज्यी। जालोर मांय बिजली ऊं जुड्या हादसा कम करण बाबत मजदूर दिवस सगळा एईएन अर जेईएन दफतरां मांय सुरक्षा पर्व रा तौर ऊं मनायी ज्यो। टोंक रा देवली अर दूणी समेत न्यारी—न्यारी ठोडां मेडिकल कैम्प लगायी ज्यो। ब्यावर मांय ई अंतर्राष्ट्रीय मजदूर दिवस रे मौके खास कार्यक्रम राख्यी ज्यो।

00000

राजस्थान मेडिकल काउंसिल दूजा देशां ऊं डॉक्टर बण र आवण वाळां सारु साल 2024—25 मांय इंटरनशिप बाबत ऑनलाइन अर्जियां मांगी है। ई सारु डब्ल्यू डब्ल्यू डब्ल्यू डॉट आर एम सी जयपुर डॉट ओआरजी वेबसाईट माथे अर्जियां दी जा सके है। काउंसिल रा रजिस्ट्रार डॉ. राजेश कुमार शर्मा बतायो के अर्जियां 5 मई 2024 री रात 12 बज्यां ताई दी जा सके है। अर्जियां मांय 6 मई ने सिंज्या 4 बज्यां ताई गलतियां सुधारी जा सकेला। इंटरनशिप सारु 9 मई ने दोपहरां 2 बज्यां ताई सीट आवंटन कर्यो जावेला अर 15 मई 2024 ताई इंटरनशिप सरु करणी व्हेला।

00000

आरटीई रा तैत अबे 10 मई ताई अर्जी दाखिल करी जा सकेला। आं अर्जियां री 13 मई ने लॉटरी निकाली जावेला। पैली आ लॉटरी आज ही निकालबा रो कार्यक्रम हो।

00000

राज्य रा केई हलकां मांय पारो सामान्य ऊं नीचे दर्ज कर्यो जा रह्यो है। मौसम महकमा ऊं मिली जाणकारी रे मुजब दिन री बगत तापमान सामान्य ऊं 2 ऊं 5 डिग्री सैल्सियस ताई जदके रात री बगत 4 ऊं 5 डिग्री सैल्सियस नीचे चाल रह्यो है। लारला 24 घंटां मांय अजमेर, जयपुर, जोधपुर अर बीकानेर संभाग मांय घणखर ठोडां अधिकतम तापमान सामान्य ऊं नीचे दर्ज करी ज्यो। प्रदेश मांय घणखर ठोडां दिन री बगत तापमान 34 ऊं 38 डिग्री सैल्सियस बीचे जदके रात री बगत 19 ऊं 22 डिग्री सैल्सियस बीचे चाल रह्यो है। लारली रात श्रीगंगानगर मांय 16 अर सीकर मांय 18 डिग्री सैल्सियस तापमान दर्ज करी ज्यो। मौसम केन्द्र जयपुर आवता 24 घंटां मांय पारो 2 ऊं 4 डिग्री सैल्सियस ताई चढबा रा आसार जताया है। ई बीचे जैसलमेर मांय बधती गर्मी ने ध्यान राखता थकां चिकित्सा अर स्वास्थ्य विभाग जनता ऊं सावचेती राखण री अपील कीनी है।

जिला रा सीएमएचओ डॉ. बी.एल. बुनकर अहलकारां ने अस्पतालां मांय मरीजां सारु पीवण रा साफ पाणी, ईलाज सारु आपतकालीन किट मांय ओआरएस, ड्रिप सेट अर ब्लीचिंग पाउडर समेत सगळी जरूरी दवाइयां राखण रा हुकम दीना। जन स्वास्थ्य निदेशक डॉ. रवि प्रकाश माथुर ई आज जयपुर मांय महकमा रा न्यारा-न्यारा दपतरां रो दौरा कर र मौसमी बीमारियां रो पसारो रोकण सारु अहलकारां ने जरूरी हुकम दीना।

00000

शाहपुरा जिला रा आमलदा गांव मांय मशरूम री खेती करण रा बारा मांय ऑर्गेनिक फूड अर रिसर्च सेंटर री ओर ऊं सिखावण कार्यक्रम राख्यी ज्यो। ई दौरान राजीविका मिशन ऊं जुड़ी महिलावां ने मशरूम री खेती रे मार्फत आमदनी बधावण रा तरीका बतायी ज्या। कार्यक्रम मांय जिला कलेक्टर राजेन्द्र सिंह शेखावत कह्यो के मशरूम री खेती ऊं कम जगह अर कम पाणी काम ले र चोखी आमदनी हासिल करी जा सके है।

000000

जयपुर रा राज्य कृषि प्रबंध संस्थान दुर्गापुरा मांय आज डिप्लोमा इन एग्रीकल्चर एक्सटेंशन सर्विसेज फोर इनपुट डीलर्स रो समापन कार्यक्रम राख्यी ज्यो। ओ डिप्लोमा कार्यक्रम राष्ट्रीय कृषि प्रबंध संस्थान हैदराबाद री ओर ऊं राख्यी ज्यो हो। 48 सप्ताह रा ई डिप्लोमा कार्यक्रम मांय 40 जणां सिरकत कीनी।

00000

जयपुर पुलिस कमिश्नरेट री ओर ऊं आज शहर मांय मोटरसाइकिल रैली निकाली ज्यी। यातायात अर महिला सुरक्षा जन जागरूकता अभियान सुरक्षा मान सम्मान रा तहत निकाली ज्यी ई रैली ने पुलिस कमिश्नर बीजू जॉर्ज जोसेफ हरी झंडी बता र रवाना कीनी। रैली मांय कमिश्नरेट रा 100 ऊं बत्ता जवान शिरकत कीनी।

बीकानेर री जेल रा जेलर तीन कैदियां रे खिलाफ़ मारपीट रो मामलो दर्ज करायो है। वे आरोपितां रे खिलाफ़ 30 अप्रैल ने संवारे जेल मांय गश्त रे दौरान मारपीट रो आरोप मांड्यो। पुलिस मामलो दर्ज कर र जांच सरु कर दीनी है। ई पाछे जेल मांय हिफ़ाज़ती इंतज़ामात् और करड़ा कर दिया ज्या है।

000

कर्मचारी भविष्य निधि संगठन ईपीएफओ री दो दिन री क्षेत्रीय समीक्षा बैठक नई दिल्ली मांय राख्यी ज्यी। इण रा उद्घाटन सत्र मांय श्रम अर रोजगार मंत्रालय री सचिव सुमिता डाबरा सामाजिक हिफ़ाजत री जरूरत रा प्रबंधन मांय ईपीएफओ रा खास काम रो जिक्र कीनो। वे सामाजिक सुरक्षा ने बधावण, दावां रो तेजी ऊं निपटारो करण समेत न्यारा—न्यारा मुद्दां माथे जोर दीनो।

00000